

SiSwati



VICTORY OR DEATH



IMANIFESTO

**YELUKHETFO LWABOHULUMENDE
BASEKHAYA YA-2026**

VOTE EFF





A. SANDVULELO SEMENGAMELI NEMKHULU WEBALAWULI

Lukhetfo lwabohulumende basekhaya lwa-2026 lungulesinye setikhatsi letibaluleke kakhulu emlandweni wentsandvo yelinyenti yetfu. Bantfu bakitsi babhekene nenhlekelele lekhulako yekubusa, kwehluleka kwekuletsa tinsita, kuswelakala kwemisebenti, inkhohlakalo, ingcilasakhiwo lebhidlakalo kanye nabomasipala labashiye tibopho tabo temtsetfosisekelo. Ngako-ke, lolukhetfo luyinhlole yekutsi imiphakatsi itawuchubeka yini nekubeketelela kubola nekunganakwa, noma itawusukuma ibuyise bomasipala bayo kanye nesitfunti sabohulumende basekhaya.

Ngalesizatfu, singena kulolukhetfo ngaphansi kwengcikitsi letsi: Kuncoba noma Kufa!

Lesitatimende sigcizelela kuphutfuma kwalenzaba futsi siyavuma kutsi bantfu bakitsi angeke basachubeka nekubeketelela timo letibangelwe yiminyaka yenkhohlakalo, kwehluleka, kukhetsana, kwehla kwemnotfo kanye nekutfunjwa kwabohulumende basekhaya bosomathenda kanye neticebi letixhumene nepolitiki. Etigidzini tebantfu baseNingizimu Afrika, kwehluleka kwabomasipala akusiyo nje indzaba yemgomo lengatsinti imphilo; kuliciniso lamalanga onkhe lelitsintsa kutfolakala kwemanti, kuphepha etitaladini, kubutfwa kwetibi, kugcinwa kwemigwaco kanye nesitfunti semiphakatsi.

I-Economic Freedom Fighters (“EFF”) yetfula lemanifesto njengelisulekuhlenga hulumende wasekhaya. Iniketa luhlelo lolusebentako nalungasetjentiswa, lolugcile ekwakheni kabusha bomasipala labasebentela bantfu kunekusebentela bosonkontileka kanye nelidlanzana lelikhetsiwe. Lemanifesto igcizelela kutsi likusasa leNingizimu Afrika lincike ekubuyiselweni kwemandla, kwetsembeka kanye nesimilo sentfutuko sahumende wasekhaya kute iNingizimu Afrika iphindze yakhe timboni. Umgomo loyisisekelo locondzisa lemigomo kutsi bomasipala kufanele basebentele imiphakatsi, hhayi tinshisekelo tangasese. Tinsita tabomasipala kufanele ticondziswe ekuniketeni tinsita telizinga lelisetulu, ekugcineni ingcilasakhiwo, ekudaleni imisebenti kanye nasekukhuliseni umnotfo wenzawo losimeme.

Bomasipala kufanele babe tikhungo tekuhlela, tekuletsa tinsita kanye netentfutuko, basebentise emandla abo angekhatsi kunekuba tindlela tenkhohlakalo nekumoshwa kwemali.

Kutinikela kwetfu ekwetfuleni lemanifesto akusuki emcabangweni kuphela. Kusekelwe elwatini lwekusebenta kanye nasekubuseni lokutibonakalisile. Nomaphi lapho i-EFF iniketwe khona umtfwalo kubohulumende basekhaya,



sikhombisile kutsi lenye indlela yekubusa ingaphumelela—indlela lesekelwe ekuphendvuleni, ekuniketeni tinsita, ekutiphatseni kahle ngetimali kanye nasekutinikeleni kubantfu.

Njengobe ipolitiki yemibuso yemfelandzawonye ikhula, i-EFF ibe sesikhundleni lesikhethsekile kubohulumende basekhaya. Nanobe ingahlali ilawula bomasipala ngalokuphelele, sisebentise umtselela wetfu kucinisekisa kutsi kubusa kusebentela bantfu. Kubomasipala labehlukene eNingizimu Afrika, i-EFF ihlale isebentisa kuba khona kwayo emikhandlwini kuveza inkhohlakalo, kuvimbela kumoshwa kwemali, kufuna kuphendvula kubaphatsi babomasipala kanye nekuvikela tinshisekelo tetakhamuti letivamile.

Lukhetfo lwa-2026 lusikhatsi lesibalulekile lesitawubumba likusasa labohulumende betfu basekhaya eminyakeni letako. Lutawusita kuncuma kutsi imiphakatsi itawuchubeka yini nekubhekana netinkinga ngaphansi kwabomasipala lababhidlikako noma kutsi kungatfolakala indlela lensha. Lolukhetfo lutawuphindze luncume kutsi tinsita temphakatsi titawuchubeka yini nekucebisa beluleki nabosomathenda, noma ekugcineni ticondziswe ekuhlangabetaneni netidzingo tebantfu.

Umlandvo usikhombise kanyenti kutsi ingucuko lenemcondvo ingenteka kuphela lapho bantfu labavamile, labasha nalabadzala, bahlangana basebentise emandla abo entsandvo yelinyenti. Ngako-ke, lemanifesto ingetulu kwemculu wemgomo. Ilubito lolusuka enhlityweni lwekutsi kutsatfwe sinyatselo kanye nesimemo lesivulekile semiphakatsi kutsi ihlanganyele ekwakheni kabusha hulumente wasekhaya.

Kuncoba noma Kufa!

B. SINGENISO

I-EFF ingena eLukhetfweni Lwabohulumende Basekhaya lwa-2026 njengenhlangano yenguquko leseyikhulile nalenenchubo, leseyi hlanguyele kubohulumende basekhaya iminyaka lengetulu kwelishumi. Loku kwekwesitsatfu i-EFF ingenela lolukhetfo kusukela yasungulwa, ngemuva kwelukhetfo lwa-2016 kanye nelwa-2021.

Yakhela esisekelweni lesicinile kanye nelwatini lweminyaka le-13 ye-EFF ePhalamende leVelonkhe, emitimbeni yesishayamthetho kanye nasemikhandlwini, leManifesto ayisiso nje sitatimende setibopho letinsha. Yakhela kumamanifesto elukhetfo lwabohulumende basekhaya e-EFF adlule,



kuManifesto Yekusungula kanye nasetincumeni te-National People's Assembly (NPA) ya-2024.

LeManifesto ibuyeketa futsi ivuselela tibopho te-EFF tesikhatsi lesidze. Isekelwe etimisweni tepolitiki telicembu kanye nelwatini lwekusebenta lelitfole eminyakeni. Emalunga e-EFF asebente njengemakhansela, emalunga emakomiti abomeya kubomasipala labakhulu, bosihlalo bemakomiti emikhandlu, bameleli bekucapha kanye netishoshovu temiphakatsi eveni lonkhe. Lemanifesto ikhombisa tifundvo i-EFF letitfolile, imphumelelo lefinyelelwe kanye netinkinga lokusafanele tilungiswe kute kwakhiwe kabusha hulumende wasekhaya.

Bomasipala Bebantfu ngaphansi kwahulumende we-EFF batawemukela Luhlelo Lwekusebenta lolukhombisa timo tabo tendzawo kanye netintfo letibalulekile ekuletsweni kwetinsita. LeManifesto iniketa luhlaka lwavelonkhe lolutawuhola umsebenti waBomasipala Bebantfu kanye nemakhansela e-EFF. Ichaza kuhlola kwetfu hulumende wasekhaya walamuhla futsi ibeka tibopho tetfu tekwakha bomasipala labanemandla, bentfufuko kanye nebantfu.

IManifesto Yelukhetfo Lwabohulumende Basekhaya ya-2026 igcile kuletindzawo letibalulekile:

- A. Simo Sahulumende Wasekhaya eNingizimu Afrika Lamuhla
- B. Iminyaka Lelishumi ye-EFF Kubohulumende Basekhaya
- C. Tibopho te-EFF Kubohulumende Basekhaya
- D. Kwenta Sabelomali Nekuxhasa Bomasipala Bebantfu
- E. Siphetfo
- F. Sifungo Selikhansela le-EFF

C. SIMO SAHULUMENDE WASEKHAYA ENINGIZIMU AFRIKA LAMUHLA

Hulumende wasekhaya eNingizimu Afrika usenkingeni lejulile nalekhula njalo. Ngemuva kweminyaka lengetulu kwemashumi lamatsafu yentsandvo yelinyenti, tigidzi tebantfu tisaphila ngaphandle kwekutfolakala lokutsembekile kwemanti lahlantekile nalaphephile, indle, gezi lotsengekako, kususwa kwetibi lokuchubekako kanye naletinye tinsita letisisekelo. Imiphakatsi ihlangabetana njalo nekuswelakala kwemanti, kuphazamiseka kwagezi, kuphuphuma kwendle, imigwaco lebhidlikako kanye nengcilasakhiwo yemphakatsi lewohlokako.



Hulumende wasekhaya utfola R110 billion lebekwa yiPhalamende njalo ngemnyaka, kodvwa ngenxa yekuphatfwa kabi kwetimali nenkhohlakalo, bomasipala behlulekile kuletsa tinsita letisisekelo kanye nekudala imisebenti lesimeme.

Bomasipala nyalo basebenta njengababutsi betikweleti, bafuna kukhokhelwa kwemanti, gezi, kubutfwa kwetibi naletinye tinsita kubantfu labangasebenti, labeswele kanye nemindeni yabothishela, banesi, emaphoyisa, emasotja, bagadzi bekuphepha kanye netisebenti tabomasipala letibhekene nebumatima betimali.

Ngekusho kwe-Auditor-General, bomasipala labangaphansi kwe-ANC, DA ne-IFP bamoshe R45.6 billion ngemnyaka wetimali wa-2024/25. Labomasipala behluleka kukhokhela emabhizinisi lamancane, tisebenti tabomasipala, Eskom, emabhodi emanti kanye nalabanye lababakweletako ngesikhatsi lesibekwe ngumtseffo.

Bomasipala abasacashi tisebenti ngalokucondzile; bancike kubatsengisi betisebenti kanye nefinkampani tabomlamuli letixhumene nepolitiki ngemakhono etebucwepheshe, ebunjiniyela, etimali kanye nekuphatsa. Ngenxa yaloko, imigodzi emigwacweni ayilungiswa, indle lephuphumako ayinakwa, tindzawo temidlalo atigcinwa, tindlu atakhiwa, ingcilasakhiwo yemanti yonakele futsi kunetindzawo letinyenti tekulahla tibi ngalokungekho emtsetfweni.

D. IMINYAKA LELISHUMI YE-EFF KUBOHULUMENDE BASEKHAYA

I-EFF yangena kubohulumende basekhaya nga-2016 njengelicumbu lepolitiki lelisandza kusungulwa, litimisele kusebentisa imikhandlu yabomasipala kutfufukisa timphilo tebantfu labavamile. Kusukela ekucaleni, emakhansela e-EFF atibonakalisa njengemalweli lanesibindzi alwa nenkhohlakalo, avikela labeswele futsi alwela kuletswa kwetinsita.

I-EFF inemakhansela la-1 075 lamele linyenti labomasipala laba-257 baseNingizimu Afrika. Lamakhansela avete inkhohlakalo, alwela kuletswa kwetinsita kanye nekucashwa ngalokuphelele kubomasipala. Aphindze alwela emanti nagezi wamahhala kulabeswele.

Emakhansela e-EFF alwe ngesibindzi nenkhohlakalo nekwehluleka kwabomeya nebaphatsi babomasipala eveni lonkhe. Ngenxa yaloko, bomeya labanyenti basuswa etikhundleni ngenkohlakalo, kufaka meya we-ANC eDitsobotla



Municipality, North West; we-DA eNelson Mandela Municipality, Eastern Cape; we-ANC eDr. JS Moroka Municipality, Mpumalanga; we-IFP eNongoma Municipality, KwaZulu-Natal; kanye nowe-ANC eSteve Tshwete Municipality, Mpumalanga.

Umsebenti longakhatsali wemakhansela e-EFF eminyakeni le-10 leyendlulile uletse imphumelelo leminyenti ekuletsweni kwetinsita, lefaka loku lokulandzelako:

1. I-EFF eCity of Ekurhuleni, Gauteng, yetfula futsi yesekela tiphakamiso tekutsi umasipala acashe ngalokucondzile nangalokuphelele bagadzi bekuphepha nebahlanti labangetulu kwa-150.
2. ECity of Ekurhuleni, Gauteng, i-EFF yenyuse linani lalabattola lusito lwabeswele nga-1 819, labattola emanti, gezi kanye netinsita tendle letisisekelo mahhala.
3. I-EFF MMC Yemanti Nendle eCity of Ekurhuleni, Gauteng, yavula i-Ililiba Water Tower ye-2-megalitre eTembisa kanye neNorthmead Water Tower ye-5.5-megalitre, lengumbhoshongo wemanti wesibili ngebukhulu eNingizimu yeMhlaba.
4. I-EFF eCity of Ekurhuleni, Gauteng, yafaka gezi emakhaya lamasha la-2 016 ngekucezdela titeshi tagezi netiguquli eClayville, Mayfield, Tokyo Phase 3, Tsakane, Kwa-Thema naseThokoza.
5. Emakhansela e-EFF eCity of Tshwane, Gauteng, alwela kubuyiselwa emsebentini kwetisebenti tabomasipala letingu-81 lebeticoshwe ngalokungekho emtsetfweni.
6. Emakhansela e-EFF eCity of Tshwane, Gauteng, alwela kususwa kwalabahlaselwa tikhukhula labangu-500 eMamelodi bayiswe eLeeuwfontein ngeNgongoni 2023.
7. I-EFF eCity of Tshwane, Gauteng, yaveta inkhohlakalo ye-DA emacebweni ekutsengisa Pretoria West neRooiwal Power Stations kanye neWonderboom Airport.
8. I-EFF MMC Yetemvelo Netibi eCity of Tshwane, Gauteng, yasusa tindzawo tekulahla tibi ngalokungekho emtsetfweni eMamelodi Hostel, Soshanguve Station naseMabopane edvute neNgaka Maseko High School. I-EFF yaphindze yesula sikweleti semanti nagezi lesingu-R4.3 billion semakhaya labeswele langetulu kwa-85 000.
9. I-EFF MMC Yetemphilo eCity of Johannesburg, Gauteng, yakhe imitfolamphilo yema-awa la-24 eWestbury naseFlorida townships futsi yavuselela imitfolamphilo eZandspruit, Protea Glen naseNaledi.
10. I-EFF eCity of Johannesburg, Gauteng, yagucula Poortjie Centre yaba sikhungo sekulapha labahlukumeteke ngekusebentisa kabi tidzakamiva.



11. I-EFF MMC Yetekuphepha Kwemphakatsi eCity of Johannesburg, Gauteng, yasungula i-JMPD Tactical Reaction Unit yekulwa nebugebengu e-CBD.
12. Emakhansela e-EFF eTswaing Municipality, Taung Municipality (Ward 4) naseMadibeng Municipality (Wards 4 na-27), North West, anikela ngemigodzi yemanti nemathange eJojo.
13. Emakhansela e-EFF eMadibeng Municipality, North West, asebentisa likhishi lesobho malanga onkhe eWard 27, leliphha emakhaya labeswele kudla.
14. Emakhansela e-EFF eDitsobotla Municipality, North West, efula siphakamiso sekungametsembi meya, lesaholela ekususweni kwemeya ye-ANC lenenkhohlakalo.
15. Emakhansela e-EFF eTaung Municipality, North West, alwela kwentiwa ngalokusemtsetfweni kweLykso Informal Settlement.
16. I-EFF eBuffalo City Municipality, Eastern Cape, yavimba kubhidliza kwetindlu ngalokungekho emtsetfweni nguhulumende we-ANC eBhongweni.
17. Emakhansela e-EFF eBuffalo City Municipality, Eastern Cape, alwela kutsi bantfu baseWard 50 netinzawo letisedvute batfole gezi.
18. I-EFF MMC Yagezi Nemandla eNelson Mandela Bay Municipality, Eastern Cape, yafutukisa Motherwell Main Substation.
19. I-EFF MMC Yesabelomali Nemgcinimafa eNelson Mandela Municipality, Eastern Cape, yesula sikweleti sa-R3.4 million se-Ekuphumleni Old Age Home ngemuva kwekuvakasha nekutinikela kweMengameli we-EFF.
20. I-EFF MMC Yesabelomali Nemgcinimafa eNelson Mandela Municipality, Eastern Cape, yesula tikweleti temakhaya lalukhuni eCentral, KwaMagxaki, Kwadwesi, Motherwell naseBlue Water Bay.
21. Emakhansela e-EFF eBig Five Hlabisa Municipality, KwaZulu-Natal, aniketa bantfu baseWard 6 emanti ngemgodzi wemanti.
22. Emakhansela e-EFF eCity of Cape Town Municipality, Western Cape, alwela kucedzelwa kwephrojekthi yemphayiphi yemanti nengcilasakhiwo yemgwaco edvute neGugulethu Housing Project.
23. Emakhansela e-EFF eCity of Cape Town Municipality, Western Cape, alwela kuvulwa kabusha kwe-Emthonjeni Swimming Pool eGugulethu.
24. Emakhansela e-EFF eEhlanzeni District Municipality, Mpumalanga, asita kugucula Elijah Mango College yaba Ehlanzeni TVET College.
25. Emakhansela e-EFF eThaba Chweu Municipality, Mpumalanga, avimba kucoshwa ngalokungekho emtsetfweni kwebahlali basemapulazini eWards 4 na-5 yi-ANC.



26. Emakhansela e-EFF eDihlabeng Municipality, Free State, asita bantfu baseWard 17 kuffola emanti nagezi wabomasipala mahhala emakhaya labeswele.
27. Emakhansela e-EFF eMafube Municipality, Free State, asita ekwabiweni kwetiza ngumasipala.
28. Emakhansela e-EFF eDihlabeng Municipality, Free State, aveta inkhohlakalo yamasipala.
29. I-EFF eEmthanjeni Municipality, Northern Cape, yalwela kusheshiswa kwekukhishwa kwetincwadzi tebunikati kanye nekulungiswa kwekusilela emuva kwesikhatsi lesidze.

Ngalemphumelelo yeminyaka lelishumi leyendlulile, i-EFF itfole lwati lolubalulekile ekucapheni nasekubuseni. Kungalesisekelo lapho i-EFF yetfula khona tibopho taBomasipala Bebantfu.

E. TIBOPHO TE-EFF

a) Bomasipala be-EFF ngeMhlaba neMnotfo Wetekulima

I-EFF iyasati sifiso semlandvo lesichubekako sebantfu semhlaba kanye nekwehluleka kwahulumende we-ANC kanyenti kukulungisa. Ngekushesha nangesikhatsi lesifishane, umgomo wabo bonkhe bomasipala be-EFF kuffola umhlaba wekukhicitatindzawo tekuhlala, tekukhonta, tekuhweba netekulima. Bonkhe bomasipala be-EFF batawuphindze bayekise kutsengisa umhlaba wamasipala, kunaloko bawabele kabusha emiphakatsini yebantfu labamnyama.

Bomasipala be-EFF batawukwenta loku:

1. Basebentise emandla ekutsatsa umhlaba netakhiwo letishiyiwe ngekwemtsetfo kute kutfolakale kutsi bantfu labasha bakusebentise ekulimeni nakuleminye imisebenti yemabhizinisi.
2. Babekele eceleni emkhatsini wa-5% na-10% wemhlaba lowabiwa kabusha bantfu labaphila nekukhubateka, babeke embili kwesekwa netinsita tekulima letifinyelelekako.
3. Bakhe luhlelo lolucacile lwemhlaba lwenzawo loluhlanganisa lisu lentfutfuko yasemakhaya lehlangele nalelesimeme, lugcile ekunciphiseni buphuya ngekusebentisa tinsita letikhona ngendlela yekusungula.
4. Bente umhlaba losedvute nemadolobha utfolakale ekwakheni tindzawo tekuhlala, kulungiswe sidzingo lesiphutfumako sengucuko yemhlaba emadolobheni.



5. Bente Tivumelwano Tekuvisisana nebaholi bendzabuko ngekutfutukisa umhlaba etindzaweni labaphethe kuto, ngenhloso yekusebentisa umhlaba wasemakhaya kusungula infutuko leholwa bantfu labasha.
6. Basebentisane nemakolishi etekulima lasedvute kucinisa tinsita tekweluleka balimi basemakhaya.
7. Basungule tikhungo tetimakethe letiphetfwe ngumasipala lapho balimi labasafufusa bangaletsa khona imikhicito yabo emakethe lesemkhatsini.
8. Bakhe silahlo setilwane lesisemkhatsini lesiphetfwe ngumasipala, lesihlose kusita balimi labasafufusa kutsengisa imfuyo yabo.
9. Basite ekuniketeni balimi labasafufusa emalungelo emanti kanye netinsita letibalulekile tekukhutsata tekulima eMidvaal, Rand West City naseMerafong, Gauteng; naseDr Pixley Ka Isaka Seme naseNkomazi, Mpumalanga.
10. Bahlukanise umhlaba ube tincenye letincane tekuvumela kulima lokucinile kwelizinga lelincane, kusekelwe bantfu labasha labanyenti.
11. Bacinise kuphokelelwa kwemitsetfo yekusetjentiswa kwemhlaba kucinisekisa kutsi umhlaba wetekulima awuguculwa ube wekukhucita tindzawo tekuhlala noma lomunye umsebeni.
12. Baxoxisane neminyango yeMbuso lenemhlaba kulabomasipala kutsi inikete umasipala lilungelo lekucala lekuala lapho umhlaba weMbuso utsengiswa noma udluliselwa, kute umasipala atfole umhlaba lodzingekako wengucuko yendzawo.
13. Babone futsi basebentisane ne-Communal Property Associations kulabomasipala kuniketa kucecesha kanye nekusekelwa ngemuva kwekwabiwa kwemhlaba.
14. Babone futsi bakhutsate emaphrojekthi ekunisela lokuncane emhlabeni lokhona, kucinisa kulima lokumelana nesimo selitulu kanye nekudala lokungenani imisebenti yebantfu labasha le-500 kumasipala ngamunye esikhatsini sekucala.

b) Bomasipala be-EFF ngeMakhaya Lahluphekako neTinsita Letisisekelo Tamahhala

Bomasipala be-EFF batawukwenta loku:

1. Bakhe bomasipala labacinisekisa kutsi bonkhe bantfu batfole tinsita letisisekelo letitsembekile naletitsengekako, njengesisekelo sesitfunt nekubamba lichaza emnotfweni.
2. Bacinisekise kutsi onkhe emakhaya lahluphekako lafanelekako atfole tinsita letisisekelo tamahhala njengesibopho semtsetfosisekelo nentfutuko.



3. Babhalise ngekutentakalela bonkhe labatfola tibusiso te-SASSA lafanelekako kanye naleminyane imindeni leswele kungakapheli emalanga la-90 bangene ehhovisi, basebentise tihlelo tabomasipala letihlangene futsi basuse tihibe tekuphatsa.
4. Banikete emanti, gezi, indle nekususwa kwetibi lokuyinsita lesisekelo mahhala kuyo yonkhe imindeni leswele, kufaka lesemikhukhwini, emakhaya lasemuva nasemaphandleni.
5. Besule tonkhe tikweleti temlandvo temindeni leswele, bafake tihlelo tekubuyisela tikweleti esimeni futsi bayekise kuncunywa kwetinsita lokujezisako emindenini lefanelekako.
6. Batfumele tihlangano tabomasipala letihambako netisebenti tetenhlalakahle emakhaya ebantfu labalele embhedzeni, labadzala nalabakhubateke kakhulu, kubabhalisa ngaphandle kwekubaphocelela kuya emahhovisi abomasipala.
7. Babeke bahumushi labacecshiwe beLulwimi Lwetandla LwaseNingizimu Afrika (SASL) kuto tonkhe tikhungo tabomasipala tekunakekela emakhasimende.
8. Bakhulise sabelo semanti nagezi wamahhala sibe sezingeni lelisekela kupheka, kufutfumala, imphilo, sitfunti kanye nemisebenti lemincane yemnotfo.
9. Bafake tihlelo tetimali letikhulako letivikela emakhaya lahluphekako tibe tacinisekisa kusimama kwetimali tabomasipala kwesikhatsi lesidze.
10. Basungule Imihlangano Yesabelomali Sebantfu lemayelana nema-ward kucinisekisa kutsi imiphakatsi ibamba lichaza ekuhloleni tinsita tamahhala, kusekelwa kwalabeswele kanye netihlelo tetimali.
11. Bacinisekise kutsi tinsita letisisekelo titsembekile, tiphephile futsi tisezingeni lelisetulu, nekuletsa tinsita kutsatfwe njengentfo lebalulekile yentfutfuko hhayi ibhizinisi.

c) Bomasipala be-EFF ngeKunciphisa Tindleko Tekuphila Emakhaya Etisebenti Nalabahola Emkhatsini

I-EFF iyabona kutsi kukhuphuka kwetindleko tekuphila akutsintsi emakhaya lahluphekako kuphela, kodvwa kutsintsa naletisebenti kanye nalabahola emkhatsini. Bothishela, banesi, emaphoyisa, tingcweti, tati nalabanye bantfu labasebentako baya ngekubhekana nebumatima bekukhokhela tinsita tabomasipala letibita kakhulu.

Kusekela lemindeni, bomasipala be-EFF batawukwenta loku:



1. Bafake tinyatselo telusito leticondziswe emakhaya etisebenti nalabahola emkhatsini lababhekene nebumatima betimali.
2. Banikete kuphumula kwesikhashana ngetimali letihlelwe kabusha, tibusiso, tindhlelo tekukhokha letitsengekako kanye netindhlelo tabomasipala tekuhlenga tikweleti.
3. Bafake tindhlelo tekwxwayisa kusenesikhatsi letisebentisa imininingwane yetikweleti nekukhokha kubona emakhaya lasengotini yebumatima betimali, bangenelele tikweleti tingakabi ngulethluleka kulawuleka.
4. Bavimbele kunqwabelana kwetikweleti temakhaya letingasimami ngekungenelela kusenesikhatsi, kusekelwa ngetimali kanye netindhlelo tekubhadala letingenteka.
5. Bacinisekise kutsi kuffola lusito lwamasipala kulula, kunesitfunti futsi akunawo emaphepha langadzingeki.

d) Bomasipala be-EFF ngeMandla Angekhatsi neKubuyisela Tinsita Ngaphakathi

Bomasipala be-EFF batawukwenta loku:

1. Etinyangeni leti-24 letitako, bacashe tisebenti tabomasipala ngalokucondzile kunciphisa kuncika kubatsengisi betisebenti nakumathenda emisebentini lebalulekile.
2. Bakhe kuphatfwa kwabomasipala lokunemandla, lokusezingeni lebucwepheshe nalokunesimilo, lokunabonjiniyela, bahleli, tingcweti, baphatsi betimali, baphatsi bemahhovisi nalabanye labaceceshiwe.
3. Bente kuphatfwa kwabomasipala kube kwebucwepheshe ngekucasha lokusekelwe eticu, emakhonweni, elwatini nasebuholini lobunesimilo.
4. Basungule emandla angekhatsi alomphela ekunakekela, kuphatsa tibi, kuphepha, kwakha ingcilasakhiwo naletinye tinsita letibalulekile.
5. Bacinise emandla ekuhlela nasekuphatseni emaphrojekthi kucinisekisa kutsi tibelomali, emaphrojekthi engcilasakhiwo netindhlelo temnotfo kuhlelwa nekusetjentiswa kahle.
6. Batfufukise kuphatfwa kwetimali, kubutfwa kwemali netindhlelo tesabelomali kucinisekisa kutsi tinsita tabomasipala tisetjentiswa kahle ekuletsweni kwetinsita.
7. Babuyise yonkhe imali lekweletwa bomasipala yiminyango yahlumende, emabizini nalabanye bakweleti labakhulu, babe bavikela emakhaya lahluphekako.
8. Bagucule tindhlelo tekutsenga kucedza inkhohlakalo, kuguculwa kwetindhlelo nekumosha, basebentise tindlela letisobala, letingenabuhlanga naletiphendvulako.



9. Bashicilele onkhe emathenda, imiklomelo netivumelwano, baphocise imiphumela lecinile yenkhohlakalo futsi bavimbele tinkampani nebantfu labatfolwe banecala.
10. Basebentise kutsenga kwamasipala kusekela umnotfo wenzawo, kudala imisebenti, imifelandzawonye, ema-SMME nemabhizinisi emalokishini.
11. Bacinisekise kutsi tinsita letikhetsekile letiniketwa ngaphandle tifaka kudluliselwa kwemakhono netinhlelo tekwakha emandla amasipala.
12. Bente kuphatfwa kwamasipala kube kwesimanje ngekuguculwa lokuphelele kwedijithali kwekubhadalisa, kunakekela emakhasimende, kuphatsa tikhalo, timvume, emalayisensi, kuxhunywa kwetinsita netinhlelo temsebenti tangekhatsi.
13. Basekele kubusa etakhiweni temphakatsi ngemihlangano yema-ward yekuphendvula, tindlela temibono yetinsita, emaforamu ekuhlela ngekubambisana kanye netikhungo tabomasipala letiniketa tinsita endzaweni yinye.
14. Bafake imigomo lecanjiwe yekusebenta, tindhlelo tekucapha kanye netinyatselo tekuphendvula etisebentini, kubaphatsi labakhulu nasebuholini babomasipala.

e) Bomasipala be-EFF ngeMisebenti nema-SMME

I-EFF iyabona kutsi bomasipala banemandla lamakhulu ekucasha bantfu, kudala imisebenti nekutfufukisa umnotfo wenzawo babe bakha emandla angekhatsi ekuletsa tinsita kahle. Bomasipala be-EFF batawasebentisa lamandla kudala imisebenti, kunciphisa kuswelakala kwemisebenti, kucinisa emandla amasipala nekukhulisa umnotfo lofaka bonkhe bantfu.

Bomasipala be-EFF batawukwenta loku:

1. Babuyisele ngekhatsi tinsita tekuphepha, kuhlanta, kubutfwa kwetibi, kugcinwa naletinye letibalulekile kule badale imisebenti yaphakadze.
2. Basungule emayunithi etingcweti temaphayiphi, gezi, kugcinwa kwemigwaco, kwakha nekulungisa ingcilasakhiwo, bagcile ekucasheni bafati, bantfu labasha nebahlali bendzawo.
3. Bafake tindhlelo tabomasipala tekufundzela umsebenti, ema-internship nekutfufukisa emakhono letixhumene nekuletsa tinsita, ingcilasakhiwo nekugcinwa kute kudaleke imisebenti lemisha.
4. Bakhe umnotfo wenzawo locinile ngekusekela ema-SMME, imifelandzawonye, emabhizinisi emalokishini nebatsengisi labangakahleleki ngemathuba ekutsenga, kusekelwa kwemabhizinisi nekufinyelela etimakethe etindzaweni letifaka uMzumbe Ward 19,



KwaZulu-Natal; Musina, Lepelle-Nkumpi, Phalaborwa ne-Ephraim Mogale, Limpopo.

5. Batfufukise futsi bandzise Tshakhuma Market ibe sikhungo sesimanje sekuhweba nekucubungula imikhicito yetekulima.
6. Babele lokungenani 80% wekutsenga kwamasipala kuma-SMME endzawo, imifelandzawonye nemabhizinisi emalokishini lasebenta emisebentini yekukhica.
7. Bahlele futsi basekele kuhweba lokungakahleleki ngekuniketa tindzawo tekuhweba, tekugcina, emanti, indle, gezi kanye nemitsetfo lesekelako.
8. Basungule tikhungo tekusekela emabhizinisi letiniketa kubhalisa, lusito lwekulandzela imitsetfo, kwelulekwa, lusito lwetimali nekufinyelela etimakethe.
9. Basungule timakethe tabomasipala, tindzawo tekugcina, ingcilasakhiwo yekubandza netikhungo tekutfutsa kuxhumanisa bakhiciti labancane, batsengisi, imifelandzawonye nemabhizinisi langakahleleki netimakethe letisimeme.
10. Bakhe tikhungo tetimboni emalokishini nasemaphandleni kusekela kukhica, kucubungula imikhicito yetekulima, tinsita nekukhica kwendzawo.
11. Bahlanganise babutsi betibi nemabhizinisi emiphakatsi etinhlelweni tabomasipala letihlelekile ngekubhadala lokulungile, tindhlelo tekusekela nemathuba emnotfo lasimeme.
12. Basungule tikhungo tekwakha tintfo letinsha kanye nebhizinisi tebantfu labasha, letiniketa emakhono edijithali, kusekelwa kwebhizinisi, tinsita nemathuba emabhizinisi ebantfu labasha.

f) Bomasipala be-EFF ngeTemidlalo, Buciko neLisiko

Bomasipala be-EFF batawukwenta loku:

1. Basuse tikhumbuto tesikhatsi selubandlululo, bashintje emagama emigwaco, emadolobha netindzawo temphakatsi letidvumisa bukoloni nelubandlululo, bafake emagama netimphawu letikhombisa umlandvo, emaqhawe netifiso tebantfu baseNingizimu Afrika.
2. Balondvolote futsi bakhutsate umlandvo, lisiko nemagugu ase-Afrika ngemamnyuziyamu, tikhumbuto, buciko bemphakatsi kanye nekumiswa kwetikhumbuto tebaholi base-Afrika nalabalwa nekoloni.
3. Bakhe, bagcine futsi batfufukise tindzawo temidlalo, imitapo yetincwadzi, emapaki, tikhungo tekutlibatisa, tinkhundla temidlalo naletinye tindzawo temphakatsi, bagcile emalokishini, emikhukhwini nasemaphandleni.



4. Bacinisekise kutsi tonkhe tinkhundla tabomasipala, emahholo emiphakatsi, emadamu ekubhukusha netikhungo tebuciko tinemarampi lasebentako, tihlalo letifinyelelwa ngetihlalo temasondvo nemakamelo ekugucula lafanele.
5. Basebentisane netinhlango tebantfu labakhubatekile kucinisekisa kutsi tintfo tabo temidlalo, buciko nelisiko ku-ward ngayinye tiyabonwa futsi tibekwa embili.
6. Bacinisekise kutsi i-ward ngayinye inetindzawo tekutilibatisa letiphephile, emajimu angaphandle, ingcilasakhiwo yemidlalo netindzawo temphakatsi temisebenti yetenhlalo, lisiko nekutilibatisa.
7. Basebentisane netikolo, tinhlango temidlalo netemphakatsi kukhulisa kubamba lichaza kutemidlalo, kutilibatisa, buciko nelisiko, ikakhulu kubantfu labasha, bafati nalabakhubatekile.
8. Babambe njalo imicimbi yetemidlalo, lisiko nemagugu kukhutsata kubumbana kwemphakatsi, lithalente lendzawo nekubamba lichaza.
9. Basungule timali tabomasipala tebuciko, lisiko nemagugu kusekela baciko, baculi, babhali, benti bemafilemu, badlali nalabanye basebenti bekusungula.
10. Basekele baculi nemabhizinisi ekusungula endzawo ngekufigyelela etindzaweni, etintfweni, ekuceshweni, emibukisweni, emicimbini yamasipala, emikhosini nasemathubeni ekutsenga.
11. Basekele titeshi temsakato temphakatsi, emaphephandzaba endzawo netinkhundla tetindzaba temphakatsi njengetinsita tentfutfuko, kwabelana ngelwati nekuveta lisiko.
12. Basungule tikhungo tebuciko nelisiko, tindzawo temphakatsi letinemisebenti leminyenti kanye netikhungo tekusungula kusekela kukhucita lisiko, kucecesha nekutfufukisa emabhizinisi.
13. Bakhutsate kukhula kwetimboni telisiko nekusungula njengebakhuciti bemisebenti, intfutfuko yemnotfo, inhlalakahle kanye nekuvimbela bugebengu.
14. Basekele kukhucita kwendzawo nemabhizinisi ebantfu labamnyama ekutsengweni kwetinsita temidlalo, lisiko nekutilibatisa.
15. Bacinisekise kutsi tinhlelo temidlalo, buciko, lisiko nemagugu tifaka bonkhe futsi tifinyeleleka kubafati, bantfu labasha nalabakhubatekile.
16. Basebentise temidlalo, buciko, lisiko nemagugu kwakha imiphakatsi lephilile, lebumbene nalemandla, babe bachubekisela embili inkhululeko yemnotfo nentfutfuko yetenhlalo.



g) Bomasipala be-EFF ngeKulingana Kwebulili, Kuphepha Nentfufuko Yetenhlalo

Bomasipala be-EFF batakwenza loku:

1. Baphocelele lokungenani 50% wekumelelwa kwebafati ebuholini, ekuphatseni, ekucashweni, emathubeni ekutsenga nasetinhlelweni tentfufuko yemnotfo.
2. Basungule Emayunithi Ekulingana Kwebulili netindlela tekucapha kucinisekisa tindlela tekulingana nekuchumanisa tindlela tekutfufukisa bafati nemanfombatana.
3. Bafake sabelomali lesiphendvula tidzingo tebulili kucinisekisa kutsi tinsita tabomasipala tifaka sandla ekutfufukisweni kwebafati.
4. Bafake tindlela tekulwa nekubuswa ngemadvodza, kubandlululwa ngebulili kanye neludlame lolubhekiswe kubafati ngemfundvo, kwatisa, kuhlenganisa umphakatsi nekufaka emadvodza ekulweni neludlame lwebulili nekubulawa kwebafati.
5. Basebentisane nebhali bendzabuko, tindlelango tetenkholo, temiphakatsi, tetenhlalakahle kanye netindlelango tekuphokelela umtsetfo kukhutsata kulingana nekucedza imikhuba lelimata emalungelo ebafati nemanfombatana.
6. Babeke embili bafati, ikakhulu emakhaya laholwa bafati, etinhlelweni tekutfufukisa umnotfo, kusekela labeswele, tindlu nentfufuko yetenhlalo.
7. Badale emathuba emisebenti, emakhono, emabhizinisi nekutsenga lacondziswe kubafati kuyo yonke imikhakha yemnotfo wenzawo.
8. Basungule tindlela letiphephile naletifinyelelekako tekubika ludlame lwebulili, kuhlukunyetwa ngekwelicansi, kucindziselwa nekuhlukunyezwa, tisekelwe ngemaphoyisa abomasipala netakhiwo tekuphepha leticecshiwe.
9. Basekele labasindzile eludlameni lwebulili ngetindzawo tekukhosela, tekuphepha, tinsita tekwelulekwa kanye netindlela tekusekela temaward.
10. Basebentisane neSouth African Police Service kanye netakhiwo tekuphepha kwemphakatsi kulwa nekuphokelela imali, ludlame nemacembu ebugebengu lahlasele batsengisi labangakahleleki, emabhizinisi emalokishini, tindzawo tekwakha, imigudu yetitfutsi nemiphakatsi lengakavikeleki.
11. Bafake eminyango nalemarampi etihlalo temasondvo kanye nemakamelo angasese ekwelulekwa kuto tonkhe titeshi temaphoyisa abomasipala netindzawo tekukhosela tesimo lesiphutfumako.



12. Bavimbele bantfu nemabhizinisi laxhumene neludlame lwebulili, kudlwengula, kuhlukunyetwa kwebantfwana, kucindzetelwa, kuphocoela imali noma bugebengu lobuhlelekile kutfola emathuba ekutsenga kwamasipala.
13. Bacinise tinsita temphilo yabomake, yekutala kanye neyekucala ngemifolamphilo lenetinsita letincono, tisebenti letengetiwe kanye netinhlelo tekusekela umphakatsi.
14. Bacinisekise kutsi ingcilasakhiwo lefaka emanti, indle, tibane, imigwaco netindzawo temphakatsi ihlelwa futsi igcinwe ngendlela lefutukisa kuphepha, sitfunti nekuhamba kwebafati.
15. Bavikele emalungelo nesitfunti semacembu langakavikeleki, kufaka bantfwana, labadzala, bantfu be-LGBTQIA+ kanye netisebenti telicansi, ngetinsita netinhlelo letifaka bonkhe.
16. Basekele imifelandzawonye leholwa bafati, emaphrojekthi etekulima, emabhizinisi emalokishini kanye naleminyane imisebenti yemnotfo yemphakatsi ngelusito lolucondzisiwe.
17. Basungule tindhlelo nemikhankaso yekulwa netidzakamiva, kukhulelwa kwebantfu labasha, ludlame lwebulili nekubola kwetenhlo, babe bakhutsata kusekelwa kwemindeni, kubumbana nekuvuselelwa kwesimilo.
18. Bafake tindlu tangasese letingakhetsi bulili kuwo onkhe emahhovisi abomasipala, imitapo yetincwadzi, tikhungo tetitfutsi kanye nemahholo emiphakatsi.
19. Bafake imikhankaso yemfundvo nekwatisa etikolweni nasemiphakatsini ngekuvimbela kudlwengula, ludlame lwebulili kanye netindlela tekubika letitfolakala kulabasindzile.

h) Bomasipala be-EFF ngeTemphilo

Bomasipala be-EFF batawukwenta loku:

1. Bandzise kufinyelela etinsitweni letiphelele tekucala, kufaka temphilo yelicansi nekutala, yabomake, i-HIV, yengcondvo kanye nekusekelwa kwengcondvo netenhlo.
2. Batfumele emayunithi etemphilo lahambako netisebenti temphilo yemphakatsi kuniketa tinsita, kuhlola, kudlulisela tiguwane kanye nekutilandzelela emaphandleni, emaphethelweni emadolobha nasemiphakatsini lengakasebentelwa kahle.
3. Babeke bahumushi labaceceshiwe beLulwimi Lwetandla LwaseNingizimu Afrika (SASL) kuto tonkhe tikhungo letinkhulu tetemphilo.



4. Baceseshe tisebenti temukela bantfu, tekuphatsa, banesi netisebenti temphilo ngemalungelo ebakhubatekile, kukhuluma ngenhlonipho netindlela tekubasusa letiphephile.
5. Bacedze imigca lemidze yetigulane letingakavikeleki ngemigca yekubekwa embili netihlalo letikhethsekile.
6. Bandzise ema-awa emitfolamphilo futsi kancane bakhe imitfolamphilo yema-awa la-12 nala-24 lapho sidzingo netinsita kuvumela khona.
7. Bavuselele Tshisaulu Clinic, Makwela Clinic neTshidimbini Clinic, bakhe netikhungo letinsha kunciphisa kuphithizela.
8. Bafake tindhlelo tedijithali tekuphatsa tigulane nema-aphoyintimenti kunciphisa kulindza, kutfufukisa kusebenta nekuvikela imfihlo.
9. Bacinise kunakekelwa kwetigulane ngekuphokelela emazinga ebucwepheshe, isimilo setekwelapha nemalungelo etigulane ngekucesha lokuchubekako netinyatselo tekuphendvula.
10. Bacasheshe, baceseshe futsi bagcine tisebenti tetemphilo, kufaka tisebenti temphakatsi, banesi nalabasebenta embili, kute kutfufukiswe kufinyelela ekunakekelweni kwelizinga lelisetulu.
11. Bacinisekise kutsi tikhungo tetemphilo tinagezi, emanti, emandla ekubambela kanye netinsita letibalulekile letitsembekile, kuvimbela kuphazamiseka kwekunakekelwa.
12. Batfufukise imigwaco, tindlela tetifutsi nengcilasakhiwo leya emitfolamphilo kute tigulane, ema-ambulensi netinsita letiphutfumako tifinyelele kalula.
13. Basungule emayunithi ekusekela bahlaselwa kanye netikhungo talabaphunyuke eludlameni lwebulili kuma-ward, letifinyelela etinsitweni tekwelapha, temtsetfo, tebufakazi, tengcondvo netenhlo.
14. Batfufukise temphilo yabomake, bantfwana nekutala ngekucesha lokukhetsekile, tikhungo letincono, kunakekela ngemuva kwekutala netindhlelo tekusekela bomake, bantfwana netisebenti tetemphilo.
15. Bacinisekise kuniketwa lokungapheli kwemaphadi ekuya esikhatsini emahhala emitfolamphilo nasetikhungweni temphilo.
16. Banikete tinsita letikhethsekile, kufaka kwelashwa kwekukhuluma nekusekelwa kwekukhula kwebantfwana labanetidzingo letikhethsekile.
17. Banikete kusekelwa lokucondzisiwe kubantfu labakhubatekile, be-LGBTQIA+, bafudvuki, labaphila ebuphuyeni nalabasindzile eludlameni lwebulili.
18. Baphokelele ema-ambulensi aphendvule kungakapheli emaminithi la-20 emadolobheni nala-30 emaphandleni.
19. Bahlanganise belaphi bendzabuko labagunyatiwe etinhlelweni temphilo tendzawo futsi banikete ingcilasakhiwo lenesitfunti sekufinyelela emitsini yendzabuko neyemdzabu kanye nekwelashwa kwesimanje.



20. Basungule tingadze temibhidvo letiphetfwe yimiphakatsi futsi tixhunywe nemitfolamphilo kusekela tindhlelo tekudla nekuphepha kwekudla kwemindeni lengakavikeleki.
21. Bafake tisebenti temphilo yemphakatsi njengetisebenti tabomasipala tekwenta tindhlelo temakhaya temphilo, kudla nekukhula kwebantwana.
22. Bakhe tikhungo tabomasipala tekuvuselela kanye netindhlelo temphakatsi tekulwa nekusebentisa kabi tidzakamiva, ikakhulu kubantfu labasha emaphandleni, emalokishini nasemadolobheni.
23. Basebentisane netikolo, tikhungo tetemphilo netindhlangano temphakatsi emikhankasweni ngemiphumela lemibi yetidzakamiva, tiwala nekubhema, bakhutsate imphilo lenhle.

i) Bomasipala be-EFF ngeMandla nagezi

Bomasipala be-EFF batawukwenta loku:

1. Batsatse gezi njengemphahla yemphakatsi yentfutuko, hhayi njengemsebenzi wekuffola inzuzo.
2. Bayekise tindleko letengetiwe kumamitha akhokhelwa kusengaphambili, bafake lamamitha mahhala futsi basuse kwenyuswa kwentsengo lokungadzingeki kwebatsengisi bagezi bangaphandle.
3. Babuyisele kulawula lokuphelele kwamasisipala ekubhadaliseni, ekusabalaliseni nasekuphatseni imali yagezi.
4. Bacinise kubufwa kwemali ngetindhlelo tekubhadalisa letincono, emamitha lahlakaniphile kanye nekuphokelela lokulungile kulabasebentisa kakhulu kodwa bangakhokhi.
5. Bafake emamitha esimanje langaphatamiseki futsi bahlele ngalokusemtsetfweni kuxhunywa kwagezi emikhukhwini kute kutfutuke kuphepha nekubufwa kwemali.
6. Bandzise kufinyelela etintfweni temandla lavuseleleka, kufaka emaphaneli elilanga, ema-geyser elilanga netindhlelo tekugcina emabhethri, emakhaya lasalindzele gezi.
7. Bacashe ngalokucondzile emacembu abonjiniyela, basebenti bagezi, bachwepheshe netingcweti kugcina ingcilasakhiwo yagezi.
8. Batfutukise, bandzise futsi bagcine titeshi tagezi, tiguquli nemanetwekhi ekusabalalisa kute gezi atsebeke nekunciphisa kucisha emiphakatsini lengakasebentelwa kahle eveni lonkhe.
9. Babeke embili kufakwa kwagezi emikhukhwini, emaphandleni nakuleto tindzawo letingakasebentelwa kahle, bandzise tibane temphakatsi naletisetigodzeni letiphakeme kutfutukisa kuphepha.



10. Basungule emacembu etebucwepheshe lakhetsekile laphendvula ngekushesha emaphutseni, ekucisheni, ekuhlulekeni kwetiguquli nasekubhidlikeni kwengcilasakhiwo, aphendvule esimeni lesiphutfumako kungakapheli li-awa linye.
11. Bente yonkhe ingcilasakhiwo yagezi ibe yedijithali, kufaka titeshi, tiguquli, tintambo tekuphakela, tindzawo temamitha nekuxhunywa kwetinsita, ngetinhlelo letihlakaniphile tekubona emaphutsa, kucekelwa phansi, kuphatamiswa nekutfufukisa kugcinwa nekuhlela.
12. Banikete lusito lolucondzisiwe, tihlelo tekubuyisela tikweleti esimeni kanye netinhlelo tekukhokha letitsengekako emakhaya lanebumatima betimali.
13. Bavimbele kuncunywa kwagezi lokungadzingeki emakhaya lasetinhlelweni letivunyiwe tekuhlenga nekuvuselela tikweleti.
14. Batfufukise emandla amasipala ekukhucita gezi, kufaka emaphrojekthi emandla lavuseleleka emiphakatsi, basebentisane ne-Eskom naletinye tikhungo temphakatsi.
15. Basebentise kukhucita kwamasipala kunciphisa tindleko tagezi, kucinisa kuvikeleka kwemandla kanye nekusekela intfufuko yemnotfo wenzawo nekuvuselela timboni.

j) Bomasipala be-EFF ngeMnotfo nekuVuselela Timboni

Bomasipala be-EFF batawukwenta loku:

1. Bahole kwakhiwa kwetimboni tendzawo kugucula bomasipala basuke etikhungweni tekusebentisa babe tikhungo tekukhucita, temisebenti kanye nemnotfo.
2. Bafune kutsi tikhungo tetimali tinikete timphahla letibekiwe futsi bacinisekise kutsi lokungenani 80% wetintfo letitsengwa ngumasipala titfolakala eveni.
3. Balwele timphahla letibekiwe netindlela tetimali tentfufuko kute kutjalwe imali engcilasakhiweni, etimbonini nasemnotfweni wenzawo lokhucita tintfo.
4. Bahlele kabusha Tihlangano Tentfufuko Tabomasipala kucinisekisa kutsi tisekela timboni, intfufuko yemnotfo wenzawo nekudaleka kwemisebenti.
5. Basungule emapaki etimboni emalokishini nasemaphandleni lagcile ekukhuciteni, ekucubunguleni imikhucito yetekulima, tintfo tekwakha, kulungisa naleminyane imikhakha yekukhucita.



6. Bacinisekise kutsi tonkhe Tindzawo Letikhetsekile Temnotfo (SEZs) nemapaki etimboni abomasipala axhunywe nemanethiwekhi etitfutsi temphakatsi lafinyelelekako.
7. Bakhe tikhungo tekukhicita letiphetfwe ngumasipala, tindzawo tekwabelana ngemsebenti nengcilasakhiwo yetimboni kusekela ema-SMME, imifelandzawonye nemabhizinisi lasafufusa.
8. Basekele kucubungula imikhicito yetekulima nemaketane elizinga lendzawo laxhumanisa balimi, bakhiciti, bacubunguli netimakethe embonini yemawolintji eGreater Giyani, Greater Tzaneen nase-Elias Motsoaledi.
9. Bandzise emathuba ebantfu labamnyama, bafati nebantfu labasha ekubambeni lichaza ekukhiciteni, ekubeni banikati kanye nasemisebentini yemnotfo.

k) Bomasipala be-EFF ngeTindzawo Tekuhlala Tebantfu

Bomasipala be-EFF batawukwenta loku:

1. Bafake tihlelo letinesikhatsi lesibekiwe tekucedza kusilela emuva kwetindlu, tinemigomo yeminyaka lecacile, tihlu tekulindza letisobala netihlelo tekuletsa letilandzelekako, basebentisane nabohulumende betifundza newavelonkhe.
2. Batfutukise futsi babele tiza letinetinsita emakhaya lafanelekako njengemphendvulo lesheshako enkingeni yetindlu, babe bachubeka netisombululo tesikhatsi lesidze.
3. Basungule irejista letikhetsekile yetindlu tebantfu labakhubatekile yekubhala nekulandzelela tidzingo tebafaki, kucinisekiswe kutsi batfola tindlu letibafanele.
4. Bashintje kuhlelwa kwemhlaba, bahlele emikhukhu ngalokusemtsetfweni futsi bayitfutukise, banikete tinsita letisisekelo, imigwaco, ingcilasakhiwo yemanti emvula kanye nelilungelo lekuhlala lelivikelekile.
5. Babeke embili tiza letinetinsita netindzawo tekuhlala letihlangene lapho kwakhiwa kwetindlu kubambezelekile khona.
6. Basungule futsi bacinise tikhungo temphakatsi tetindlu tenhlalakahle letakha, tiphatse futsi ticashise tindlu letitsengekako emakhaya etisebenti, labahola emkhatsini kanye nebafundzi.
7. Balawule futsi basekele tihlelo tetindlu letitsengekako temakhaya langafaneleki kuffola tindlu tamahhala kodwa langakwati kuffola timali tangasese.



8. Bente luhlolo loluphelele lwemhlaba netindlu kutfola umhlaba longasetjentiswa, emaphrojekthi lashiye, takhiwo letitfunjiwe kanye nemathuba entfutuko.
9. Bacedze onkhe emaphrojekthi etindlu lame nalashiye ngekungenelela kwahulumende ngalokucondzile, kuphatfwa lokucinile nemiphumela yekuphendvula.
10. Basungule tindhlelo tekwabiwa kwetindlu letisobala naletihlanganisiwe, basheshise kukhishwa kwetincwadzi tebunikati futsi bacedze inkhohlakalo.
11. Bavimbele kucoshwa ngalokungekho emtsetfweni futsi banikete lenye indzawo yekuhlala lapho kudzingeka kususwa bantfu.
12. Bagucule takhiwo letingasetjentiswa naletitfunjiwe tibe tindlu letiphephile, letilawulwako naletitsengekako lapho kufanele khona.
13. Babeke embili tindlu letihlanganisa bantfu bemihlo leyehlukene etindzaweni temadolobha letibekwe kahle, kuguculwe kuhlelwa kwetindzawo kwelubandlululo nekunciphisa kungalingani.
14. Bakhe emandla angekhatsi ekwakha, banciphise kuncika kubosonkontileka futsi baphocelele imiphumela lecinile yemsebenti lomubi, inkhohlakalo nekushiya kwemaphrojekthi.
15. Babele bonkhe bantfu labaphila nekukhubateka tindlu etinyangeni tekucala leti-12.

I) Bomasipala be-EFF ngeTekudweba Tindhanti

Bomasipala be-EFF batawukwenta loku:

1. Bakhe tindhlela tentfutuko yemnotfo waselwandle etifundzeni taselugwini, kusebentiswe tinsita telwandle kwandzisa umnotfo wemiphakatsi eKnysna naseMossel Bay, Western Cape; iNgquza Hill, Eastern Cape; nasePort Nolloth, Northern Cape.
2. Bakhe timakethe tetindhanti letifinyelelekako letinematafula ekuhweba lakhelwe bantfu labakhubatekile.
3. Bacale lokungenani iphrojekthi yinye yekufuywa kwetilwane tasemantini lephefwe ngumphakatsi kungakapheli iminyaka lemibili, kudalwe imisebenti lesimeme, ikakhulu yebantfu labasha.
4. Basungule Timali Letikhetsekile Tentfutuko Yetindhanti ukusita badvwebi bendzabuko ngetikebhe, tintfo tekudweba, tindzawo tekucina tibandza, tekucubungula netekupakisha.
5. Basebentisane nahulumende wavelonkhe kucinisekisa kutsi badvwebi bendzawo e-iNgquza Hill, kufaka Msikaba, Mbotyi, Grosvenor, Mkambathi neNdlambe, Eastern Cape; Knysna, Western Cape; nePort



Nolloth, Northern Cape, bahlanganiswa ngalokunemcondvo emnotfweni wetinhlanti.

6. Batfutfukise kufuywa kwetilwane tasemantini nekudweba tinhlanti temanti lamnandzi eGariep Dam, Vaal Dam naseBloemhof Dam, Free State; naseNandoni Dam, Flag Boshielo Dam naseTzaneen Dam, Limpopo, kwandzisa kudla, imisebenti nemnotfo wendzawo.
7. Basite emabhizinisi lamancane etinhlanti nekufuywa kwetilwane tasemantini kubhalisa, kulandzela imitsetfo, kufinyelela etimakethe, etimalini nasekusekelweni ngebucwepheshe.

m) Bomasipala be-EFF ngeManti, Temvelo neKugucuka Kwesimo Selitulu

Bomasipala be-EFF batawukwenta loku:

1. Bahlanganise kutivumelanisa nekugucuka kwesimo selitulu nekusimama kwemvelo kuko konkhe kuhlala nemaphrojekthi entfufuko.
2. Bacinisekise kutsi imigomo netincumo tabomasipala tacinisa kumelana nesimo selitulu nekunciphisa bungoti bemvelo, umnotfo nesimo selitulu.
3. Banikete kwehliselwa nekukhutsatwa kwemarethi emakhaya nasemabhizinisini latjala imali emandleni lavuseleleka nakubuchwepheshe lobulondvolota imvelo.
4. Basungule tindzawo tabomasipala tekukhulisa titjalo tendzabuko nekucinisa kuvikelwa kwetinhlobonhlobo tetilwane netitjalo.
5. Basungule emacembu langiwo ekugcina ingcilasakhiwo yemvelo avikele tindzawo letimanzi, imifula, emabhande laluhlata, tindzawo letibucayi kanye naletisengotini yekuguguleka kwemhlabatsi.
6. Bakhe futsi bagcine emapaki, tindzawo letiluhlata netikhungo temfundvo yetemvelo kukhutsata kwati ngemvelo nenhlalakahle yemphakatsi.
7. Balungise kuvuza kwemanti kungakapheli lilanga kubikiwe futsi basungule emacembu emaphayiphi abomasipala etindzaweni letivuza kakhulu.
8. Besule sikweleti semanti lesibangelwe kubhadaliswa ngalokungakalungi futsi banikete lusito lwetikweleti emakhaya langakavikeleki, kufaka labaffola impesheni nebantfu labakhubatekile.
9. Bacinisekise kutsi umuti ngamunye utfola emanti empompi lahlantekile, laphephile nalatsembekile.
10. Bakhe tindlu tangasese netikhungo tendle letineminyango lebanzi, emarampi labusheleleti nendzawo yekujika yebasebentisi betihlalo temasondvo.
11. Bacinise kulawula kwamasipala ingcilasakhiwo yekusabalalisa emanti futsi batfutfukise kubuswa kwemanti, kugcinwa nekuletsa tinsita.



12. Babuyisele tinsita temaloli emanti ngaphansi kwamasipala futsi bawasebentise kuphela esimeni lesiphutfumako.
13. Bacinisekise kutsi ngesikhatsi sekuncunywa kwemanti noma somiso, emaloli aphutfumako aletsa emanti eminyango yebantfu labakhubatekile ngaphandle kwekubalindzisa emigceni yemphakatsi.

n) Bomasipala be-EFF ngeNdle nekuPhatfwa Kwemanti Langcolile

Bomasipala be-EFF batawukwenta loku:

1. Bacedze tonkhe tindlu tangasese temabhakede naletimigodzi lengaphephile, bacinisekise kufinyelela kwabo bonkhe etinsitweni tendle letinesitfunti.
2. Baxhumanise emakhaya netinhlelo tendle letisebentako futsi banikete lobunye buchwepheshe lapho kuxhuma lokujwayelekile kungakenteki khona.
3. Bacinisekise kutsi tonkhe tikolo, imitfolamphilo netikhungo temphakatsi tinfinsita tendle letiphephile, letihlantekile naletitsembekile.
4. Banikete tindzawo tendle letivikelekile, letikhanyiswe kahle naletigcinwa kahle emikhukhwini njengelyatselo lesikhashana kusakhiwa tinsita talomphela.
5. Basungule emacembu ekulungisa laphendvula ngekushesha ekuvalekeni, ekuvuzeni, ekuphuphumeni nasekuhlulekeni kwendle.
6. Batfutukise, bavuselele futsi bandzise ingcilasakhiwo yekuhlanta emanti langcolile kuvimbela kungcola kwendle nekuvikela imphilo yemphakatsi.
7. Bakhe futsi bagcine tindlu tangasese temphakatsi letihlantekile, letiphephile naletifinyelelekako etikhungweni tetitfutsi, etimakethe, emapaki, tindzawo tekutilibatisa nakuleto temphakatsi.
8. Bacinise kulandzelwa kwemazinga avelonkhe ekhwalithi yemanti nekuPhatfwa kwemanti langcolile.
9. Batjale imali ekucwaningeni, ekusunguleni, ekutfutukiseni emakhono nakubuchwepheshe besimanje kutfutukisa tindhlelo tendle nemanti langcolile.
10. Bakhe bomasipala labahlantekile, labaphilile nalabanesitfunti, lapho tindhlelo tendle tivikela imphilo yemphakatsi, imvelo nenhlalakahle yebahlali.



o) Bomasipala be-EFF ngeKubutfwa nekuPhatfwa Kwetibi nekuHlanteka Kwemvelo

Bomasipala be-EFF batawukwenta loku:

1. Bacinisekise tinsita letitsembekile tekubutfwa kwetibi kuyo yonkhe imiphakatsi futsi banikete ingcilasakhiwo leyanele etindzaweni temphakatsi, emalokishini, emikhukhwini nasetindzaweni letigcwele bantfu.
2. Bacedze kulahlwa kwetibi ngalokungekho emtsetfweni ngekuphocenelela umtsetfo, tindhlelo tekuhlanta njalo kanye nengcilasakhiwo lencono.
3. Bemukele futsi basebentise Umkhankaso wa-Andries Tatane kubona, kuhlanta nekuvuselela tindzawo tekulahla tibi ngalokungekho emtsetfweni, bakhutsate kubamba lichaza kwemphakatsi.
4. Bahlole, bavuselele futsi bandzise tindzawo tekulahla nekudlulisa tibi kucinisekisa kulandzelwa kwemazinga emvelo nekuphepha.
5. Babuyisele kubutfwa nekuPhatfwa kwetibi ngaphansi kwamasipala kucinisa emandla nekunciphisa kuncika kubosontileka.
6. Bahlanganise babutsi betibi, imifelandzawonye nemabhizinisi ekusebentisa tibi kabusha etindhlelweni tabomasipala, babanikete inkokhelo lelungile nemathuba emnoffo lasimeme.
7. Batjale imali ekusebentiseni tibi kabusha, ekwenteni imikhicito nangemnoffo loyindilinga, kunciphisa kuncika etindzaweni tekulahla nekudala imisebenti lesimeme.
8. Batjale imali ekucwaningeni, ekusunguleni, ekutfufukiseni emakhono nakubuchwepheshe besimanje kutfufukisa kubutfwa nekuPhatfwa kwetibi.
9. Basebentise tindhlelo tetibi netemvelo kudala emathuba emisebenti lasimeme emiphakatsini yendzawo.
10. Bakhe bomasipala labahlantekile, labaphilile nalabanesitfunti, lapho tindhlelo tetibi tivikela imphilo yemphakatsi, imvelo nenhlalakahle yabo bonkhe bahlali.

p) Bomasipala be-EFF ngeBugebengu, Inkohlakalo nekuPhepha Kwemphakatsi

Bomasipala be-EFF batawukwenta loku:

1. Batfufukise titeshi temaphoyisa, tikhungo tekuphepha nemakhotho abomasipala ngemarampi, iminyango lecitfako, ematafula lamafishane netindzawo tekubopha letifinyelelekako.



2. Bacinise emandla ekuphokelela umtsetfo ngekwandzisa tisebenti, kucesha netinsita, basite bomasipala bakhutse tindlela letifanele, kufaka ematiko lakhetsekile, tinsita letabelwana noma emayunithi laciniwe emitsetfo.
3. Basebentisane neSouth African Police Service nalabanye kwakha emasu lahlangene ekuvimbela bugebengu lasuselwa etindzaweni letiyingoti.
4. Bafake Luhlelo Lolucondzisiwe Lwekuphendvula Ludlame Lwebulili nekuBulawa Kwebafati eThohoyandou Police Station, lebhalse linani lelisetulu kakhulu lemacala ekudlwengula.
5. Bafake Luhlelo Lwamasipala Lophephile lolugcile ekuvimbeleni bugebengu, kuphokelela imitsetfo nasetindzaweni temphakatsi letiphephile.
6. Bacinise futsi bandzise emaforum endzawo ekuvimbela bugebengu, atfutukise kubambisana kwabomasipala, imiphakatsi, emaphoyisa emiphakatsi netinhlangano temtsetfo. Kubekwe embili Umzumbe (Ward 19), Umlazi (Wards 76 na-78), Maphumulo (Ward 4), uMshwathi, Mandeni, eThekwini Outer West (Wards 2, 4, 5, 8 na-91), eThekwini Far North (Wards 59, 102 na-112), ne-eThekwini Central, KwaZulu-Natal; Breede Valley, Mitchells Plain nePhilippi eCity of Cape Town, Western Cape; neCity of Johannesburg, Gauteng.
7. Basekele emasu emiphakatsi ekuvimbela bugebengu ngekufinyelela etindzaweni tabomasipala, kubambisana naletinye tihlobo telusito.
8. Basungule emakhotho abomasipala kutfutukisa kuphokelelwa kwemitsetfo nekunciphisa kubambezela kwekulunga.
9. Basebentise buchwepheshe besimanje, kufaka CCTV, ema-drone, tihlelo tekubona kudvubula netikhungo tekucapha ngesikhatsi sangempela.
10. Basungule tihlelo tekuphepha emaphandleni kulwa nekwebiwa kwemfuyo, kuceskelwa kwengcilasakhiwo nalobunye bugebengu eMatatiele, Ntabankulu, Mbhashe naseWinnie Madikizela-Mandela Municipality, Eastern Cape; Umzimkhulu, Jozini neMhlabuyalingana, KwaZulu-Natal; Ngwathe, Mafube neKopanong, Free State; Ramotshere Moiloa neDitsobotla, North West; Musina neMakhuduthamaga, Limpopo; kanye neJoe Morolong neGa-Segonyana, Northern Cape.
11. Bente luhlolo lwendlela yekuphila yetiphatsimandla tabomasipala futsi baphokelele imiphumela lecinile yenkhohlakalo nekungalungi.
12. Bakhe bomasipala labaphephile, labavikelekile nalabaphefwe kahle, labavikela bahlali, emabhizinisi nengcilasakhiwo yemphakatsi.



q) Bomasipala be-EFF ngeNtutfuko nekuCiniswa Kwebantfu Labasha

Bomasipala be-EFF batakukwenta loku:

1. Bagcine emarekhodi lacinisekisiwe ebantfu labasha labangasebenti kucinisekisa kufinyelela lokulungile nalokusobala emisebentini, ekucecesheni, emibasari nasetinhlelweni tekusekela emabhizinisi.
2. Bacinisekise kutsi lokungenani 40% wemathuba emisebenti abelwa bantfu labasha labaneminyaka le-18 kuya ku-35, ikakhulu engcilasakhiweni, etinsitweni tebucwepheshe, etibini, emandleni, emantini nasetinsitweni temphakatsi.
3. Babele lokungenani 50% wemathuba ekutsenga emabhizinisini nasemifelandzawonyeni yebantfu labasha ngekusekelwa lokucondzisiwe, kuhlukaniswa kwetivumelwano nekukhokha ngekushesha.
4. Baceseshe futsi bente bantfu labasha babe tingcweti, bachwepheshe nalabanye basebenti labanelikhono ngemasu ekufundzela umsebeni, ema-internship nekutfutukisa emakhono.
5. Banikete kucecesha kwemahhala kwelayisensi yekushayela kanye nelitfuba linye lekuhlolwa kubantfu labasha labangasebenti nalabaphase matikuletjeni.
6. Basungule Tikhungo Temathuba Ebantfu Labasha netinsita tema-ward letiniketa kwelulekwa ngemisebenti, kusekelwa kwemabhizinisi, lusito lwekucashwa, kufinyelela kudijithali nekusekelwa kwekufaka ticelo, kucecesha nemabhizinisi.
7. Bahlele kabusha tindhlelo tekucashwa kwebantfu labasha, kufaka Expanded Public Works Programme (EPWP), tibe nemisebenti lefanele labakhubateke emtimbeni.
8. Babeke bahumushi labaceceshiwe beLulwimi Lwetandla LwaseNingizimu Afrika (SASL) emibukisweni yemisebenti, tinkhabavuthano tebantfu labasha netemabhizinisi letibanjwa ngumasipala.
9. Bacinise tindhlelo tekuvimbela kusebentisa kabi tidzakamiva kanye nemasu ekuvuselela emiphakatsi ngetikhungo tabomasipala nekusekela tindhlangano.
10. Banikete bosomabhizinisi labasha, batsengisi labangakahleleki nemifelandzawonye tindzawo tekuhweba, tikhungo, ingcilasakhiwo netinsita tekusekela emabhizinisi.
11. Babeke embili emibasari yemakhono lashoda naletebucwepheshe futsi bacinisekise kutsi labaphothulile bafaka sandla ekwakheni emandla abomasipala.



12. Basebentise kukhutsata, timvume netinhlelo temnotfo kukhutsata kucashwa lokunyenti kwebantfu labasha emnotfweni wendzawo.
13. Bashicilele njalo imibiko yekucashwa, kutsenga, kucecesha, emibasari nekutfutukiswa kwemabhizinisi kucinisekisa kubonakala nekuphendvula.

r) Bomasipala be-EFF ngeTetutfutsi

Bomasipala be-EFF batawukwenta loku:

1. Bagcine yonkhe imigwaco isesimeni lesiphephile naletisebentako futsi kancane bafake ungqimba emigwacweni yegraveli kucinisekisa kufinyelela kunoma ngusiphi simo selitulu eMogale City, Rand West, Gauteng, naseKhai-Ma, Northern Cape.
2. Bacinisekise ngekushesha kufakwa kabusha kwegraveli ku-R524 kusuka Louis Trichardt/Makhado, kudlule Thohoyandou kuya ePunda Maria Gate yeKruger National Park.
3. Babeke embili kugcinwa nekutfutukiswa kwemigwaco leya etikolweni, emitfolamphilo, emathuneni, etikhungweni temnotfo nasetindzaweni temphakatsi.
4. Bacinisekise kutsi emarenki ematekisi, titeshi temabhasi netitimela naletinye tindzawo tetitfutsi tihlantekile, tiphephile, tikhanyiswe kahle futsi tinemanti, indle nekususwa kwetibi.
5. Bafake kutitfutsi tabomasipala timemetelo telivi netibonisi tedijithali letibonakalako tekumemetela tindzawo tekuma nemizila.
6. Bente kubambisana lokusemtsetfweni netinhlangano tematekisi ekuphatseni emarenki, tindzawo temphakatsi nengcilasakhiwo yebagibeli ngendlela lephephile nalephumelelayo.
7. Bahlele emarenki netikhungo tetitfutsi njengezindzawo tekuhweba letihlelekile letisekela batsengisi labangakahleleki nemnotfo wendzawo.
8. Bafake tindhlelo letisobala naletisheshako tekukhipha timvume tematekisi naletinye tetitfutsi tabomasipala.
9. Bafake ingcilasakhiwo yesimanje yekuphepha, kufaka tibane, kucapha netinyatselo tekuvikela emarenki nasetiteshini temabhasi netitimela.
10. Bandzise tinsita tetitfutsi temphakatsi letitsembekile naletitsengekako, kufaka emabhasi abomasipala newesivumelwano, ikakhulu emalokishini nasemaphandleni langakasebentelwa kahle.
11. Bacinisekise kutsi ematekisi awabanjwa ngalokungadzingeki noma ngalokungekho emtsetfweni ngemaphoyisa abomasipala.



12. Banikete tinhlango tematekisi, imifelandzawonye nemabhizinisi emiphakatsi imali yekuhlanta nekugcina emarenki, tindlu tangasese netindzawo tebagibeli.
13. Banikete tiffutsi letiphephile, letitsembekile naletixhaswe ngemali kulabafola impesheni, labakhubatekile nalabangasebenti.
14. Banikete labadzala labafola SASSA tiffutsi letiphephile naletitsembekile ngemalanga labalandza ngawo impesheni netibonelelo.
15. Bente luhlolo njalo lwengilasakhiwo yetiffutsi netivumelwano kucinisekisa kutsi tinsita temphakatsi tisekela kuletsa tinsita, umnotfo netidzingo temiphakatsi.
16. Bavuselele futsi bagcine tikhumulo tetindiza tabomasipala, bakhe nengilasakhiwo yetindiza letincane lapho kungenteka khona.
17. Bente bomeya, ema-MMC netiphatsimandla tiphendvule ngesimo semigwaco, ingilasakhiwo yetiffutsi netikhungo tetiffutsi temphakatsi.
18. Baphocelele imitseffo yabomasipala kucinisekisa kutsi bonkhe basebentisi betiffutsi basebenta ngalokusemtsetfweni nangekuphendvula, bavikela bagibeli, emabhizinisi nemiphakatsi.

s) Bomasipala be-EFF ngeNgcilasakhiwo Yabomasipala

Bomasipala be-EFF batawukwenta loku:

1. Bakhe kabusha emandla angekhatsi ngekucasha bonjiniyela, bahleli bemadolobha, bacambi betakhiwo, tingcweti, basebenti bemaphayiphi, bachwepheshe nalabanye labanelikhono lekuhlela, kwakha nekugcina ingilasakhiwo.
2. Bacedze kukhishwa ngaphandle kwetinsita letibalulekile futsi basungule emacembu alomphela etemigwaco, emanti, indle, emanti emvula netindzawo temphakatsi.
3. Bacale luhlelo lolukhulu lwekwakha kabusha ingilasakhiwo kulungisa kusilela emuva kwemigwaco, emanti, indle, emanti emvula netindzawo temphakatsi.
4. Basebentise kwakha nekugcina ingilasakhiwo njengendlela lenkhulu yekudala imisebenti, bagcile kubasebenti bendzawo, bafati, labakhubatekile nebantfu labasha.
5. Bagcine futsi batfutfukise imigwaco, emabhuloho, tibane temgwaco, tibane tetitaladi, timphawu temgwaco netinhlelo temanti emvula kucinisekisa kuhamba lokuphephile kwebantfu netimphahla.
6. Balungise, bandzise futsi bagcine ingilasakhiwo yemanti, kufaka emaphayiphi, emadamu netikhungo tekuhlanta, kucinisekisa emanti latsembekile nekucedza kulahleka ngekuvuza nekunganakekelwa.



7. Batfufukise futsi bagcine ingcilasakhiwo yendle, kufaka emaphayiphi netikhungo tekuhlanta emanti langcolile, kucedza kuphuphuma nekucinisekisa tinsita letinesifuntsi kuyo yonkhe imiphakatsi.
8. Babeke embili intfufuko yengcilasakhiwo emikhukhwini, emalokishini, emaphandleni nasetindzaweni lebetinganakekelwa emlandvwini.
9. Bagcine futsi batfufukise ingcilasakhiwo etindzaweni tekuhlala, tekuhweba netetimbongi kusekela emakhaya, emabhizinisi, tati kanye nekukhulisa umnotfo wenzawo.
10. Bacinisekise kutsi ingcilasakhiwo isekela kwakhiwa kwetimbongi, kutjalwa kwemali, kukhula kwemnotfo kanye nekwandza kwemabhizinisi endzawo.
11. Bacinisekise kutsi kutjalwa kwemali engcilasakhiweni kuhambisana nekuhlalelwa kwetindzawo, tindzawo tekuhlala letihlangene kanye netinhloso tesikhatsi lesidze tabomasipala.

F. KWENTA SABELOMALI NEKUXHASA BOMASIPALA BEBANTFU BE-EFF

Hulumende wasekhaya usenkingeni ngenxa yekuphatfwa kabi nekumoshwa kwetimali kubomasipala labaholwa yi-ANC, DA ne-IFP, lokulimata kuletswa kwetinsita. Kudzingeka indlela lensha yesabelomali netimali, kucinisa kuphatsha nekucinisekisa kutsi baholi babeka imiphakatsi embili.

Nyalo bomasipala batfola cishe 9% wetimali letabelwa bohulumende wavelonkhe, wetifundza newasekhaya yiPhalamende. I-EFF itawuchubeka nekulwela kutsi lesabelo senyuswe sibe lokungenani 15%, kukhululwe tinsita temigwaco, emanti, gezi netindlu.

Bomasipala Bebantfu be-EFF batawusungula Emayunithi Ekucapha Ngebuwepheshe Tibusiso Tengcilasakhiwo. Atawuba nabonjiniyela, bacambi betakhiwo, bahleli bemadolobha, tingcweti nabahlatiyi betimali labasebenta ngalokuphelele kucinisekisa kutsi timali letivame kulahleka ngekuhlalelwa kabi nenkhohlakalo tisetjentiswa kahle.

Bomasipala Bebantfu be-EFF batawusebentisana nemabhizinisi kwakha imigwaco, tindhlelo temanti, gezi, tindlu nengcilasakhiwo yedijithali, babe bagcina letimphahla tisebantfwini.

Batawenta tivumelwano nemabhizinisi endzawo kusekela kugcinwa kwengcilasakhiwo, kufaka kulungisa tindlela temaceleni nemigodzi, kubeka imigcoma yetibi etindzaweni tawo nekuhlanta tindzawo temphakatsi.



Batawabela netinhlango tematekisi imali yekuhlanta nekugcina emareni, imigudu yetifutsi netindlu tangasene. Bomasipala batawuphindze babutse imali labayikweletwa ngemabhizinisi lamakhulu neminyango yahlumende.

Tigidzigidzi temaRandi tilahleka njalo ngemnyaka ngekumoshwa kwemanti nagezi lokubangelwa yingcilasakhiwo lengaginwa kahle. Bomasipala Bebantfu be-EFF batawuyilungisa futsi bafake emamitha lahlakaniphile kuvikela imali yamasipala.

Ngekusho kwe-Auditor-General yaseNingizimu Afrika, bomasipala basebentise imali lengetulu kwa-R1.6 billion kubeluleki ngemnyaka wetimali wa-2024/25. Bomasipala Bebantfu be-EFF batawubeka embili kwakha emandla angekhatsi ngekucasha tati letifanele kunekuncika kubeluleki, kucinisekisa kutsi imali yemphakatsi isetjentiswa kahle.

Banikati bemabhizinisi labanyenti bayahluleka kwakha timboni ngoba bete umhlaba. Bomasipala Bebantfu be-EFF batawuniketa banikati bemabhizinisi umhlaba wamahlala wekwakha timboni nekudala imisebenti.

G. SIPHETFO

Lamuhla iNingizimu Afrika ibhekene nelukhetfo lolungeke lusachubeka luhlehliswa. Lukhetfo emkhatsini weKuncoba noma Kufa. Kubhidlike kwabomasipala nekwehluleka kwahlumende wasekhaya akukhulumi nje ngemaphayiphi laphukile, imigodzi, kubutfwa kwetibi, emanti nagezi.

Kukhuluma ngetimphilo temalanga onkhe tebantfu bakitsi. Kukhuluma ngamake waseGiyani longakwati kuwasha nekuphekela bantfwana ngoba kute emanti; bantfu labasha baseSoweto naseMamelodi labangawutfoli umsebenti ngoba bete budlelwane bepolitiki; intfombatana yaseMthatha lephocelelwa kulala nelikhansela noma meya kute icashwe; kanye nebantfu labasha baseKhayelitsha naseMitchells Plain labatinikele kutidzakamiva nasetjwaleni ngenca yekweswela umsebenti.

Kukhuluma ngetisebenti nalabattfoli impesheni eRustenburg labakhokhela tinsita labangattfoli, kanye nebantfwana baseMangaung labendlula indle lephuphumako nemigwaco lenemigodzi bayasikolweni.

Bantfu bakitsi beve tetsembiso letanele eUmlazi naseKwaMashu, tinkhuluma letanele eNkomazi naseMbombela, futsi bafundze emamanifesto lenele. Lokufunwa yiNingizimu Afrika nyalo kutinikela lokungiko.



Tibopho letikulemanifesto akusito tetsembiso letingenalutfo. I-EFF iyati kutsi bantfu bakitsi bakhatsela. Leti tibopho letitawulandzelwa ngekutiphatsa, kwetsembeka nekutimisela.

Lemanifesto isimemetelo sekutsi hulumende wasekhaya angasebenta nekutsi bomasipala bangaba tikhungo tebuncono nekuletsa tinsita, ngaphandle kwenkhohlakalo.

Sonkhe sibopho lesikulemanifesto siyasebenta futsi singalinganiswa.

Tibopho tekuqinisekisa kutsi kute umntfwana wase-Emfuleni locabanga kutsi indle etitaladini ijwayelekile, kute umndeni waseLusikisiki lowemukela bumnyama njengesimo salomphela, futsi imiphakatsi yasePolokwane nasePhokwane ayiphocelwa kuphila ngaphandle kwetinsita nesitfunti.

Liciniso kutsi kute inkhululeko yangempela ngaphandle kwabomasipala labasebentako. Kute sitfunti lapho emanti angahambi, gezi angatsembeki, imigwaco ingaphephile nemitfolamphilo ingakhoni kusita labagulako.

Sonkhe sibopho sinemandla. Sibopho sekubuyisela kuphendvula lapho konakele khona nekucinisekisa kutsi hulumende wasekhaya ubonakala etimphilweni tebantfu, hhayi etinkhulumweni noma etingomeni.

Umsebenti losembili angeke ube lula. Utawuphikiswa ngulabazuza ekubhidlikeni kwabomasipala, ebuhlungwini bebantfu kanye nesimo lesikhona.

Bantfu base-Ekurhuleni, Johannesburg, Tshwane, Mangaung naseNelson Mandela Bay. Tisebenti taseCape Town, eThekwini naseBuffalo City. Bantfu baseNingizimu Afrika.

Setfula iManifesto Yelukhetfo Lwabohulumende Basekhaya ya-2026 njengesibopho seminyaka lesihlanu sekwakha Bomasipala Bebantfu labatawuletsa Inkhululeko Yemnotfo.

Kuncoba noma Kufa, votela i-EFF!
Sengeto A:



H. SENGETO A: SIFUNGO SELIKHANSELA LE-EFF

Mine, _____, ngemukela ngekutitsandzela kutsi i-Economic Freedom Fighters ingitfumele njengelikhansela kubohulumende basekhaya.

- Ngiyafunga kutsi ngitawusebentela bantfu baseNingizimu Afrika ngekutiphatsa, kwetsembeka, bucofho nekutinikela kulenguquko.
- Ngiyati kutsi kutfunyelwa akusilo lilungelo noma umsebenti, kodwa ngumtfwalo nemyalo wenhlangano.
- Ngiyafunga kutsi ngitawuba likhansela leletsembekile emphakatsini wami nakubantfu baseNingizimu Afrika.
- Ngiyatinekela ekusebenteleni umphakatsi wami ema-awa la-24 ngelilanga.
- Ngitawuhlala ku-ward yami sonkhe sikhatsi sami sekusebenta futsi ngeke ngifuduke.
- Ngeke ngihlanganyele enkhohlakalweni noma ekwebiweni.
- Ngeke ngihlanganyele enkhohlakalweni yetinhlu tetindlu.
- Ngeke ngihlanganyele enkhohlakalweni yetinhlelo tekucasha.
- Ngeke ngente ibhizinisi namasipala noma ngihlanganyele kumathenda.
- Ngeke ngente Ludlame Lolusekelwe Ebulilini noma lokunye kutiphatsa lokwephula sitfunti nemalungelo ebafati nebantfwana.
- Ngeke ngisebentise tidzakamiva noma ngibonakale ngidzakwe embikwebantfu.
- Ngitawukhokha iminikelo yelicembu lami ngalokuphelele nangesikhatsi njalo ngenyanga futsi ngeke ngehluleke kulesibopho.

Ngiyemukela kutsi uma ngephula letibopho, uMtseffosisekelo we-EFF, iManifesto Yekusungula, iKhodi Yekutiphatsa noma imiyalo yenhlangano, i-Economic Freedom Fighters kufanele ingibite futsi ingisuse ekutfunyelweni njengelikhansela.

KUSAYINWE e _____ ngalolusuku lwa__ ku _____ 2026.

LIKHANSELA

Sisayino: _____

EGAMENI LE-ECONOMIC FREEDOM FIGHTERS

Losayinako Logunyatiwe: _____

Sisayino: _____

FAKAZI 1

Ligama: _____

Sisayino: _____

FAKAZI 2

Ligama: _____

Sisayino: _____